

R E G N U M
N E A P O L I T A N U M .

Vniuersum hoc Regnum hodie continetur inter Hadriaticum & Tyrrenum mare, ab amne Truento, & Fundis, vsque ad Fretum Messanæ: continetque nouem opulentissimas, amœnissimasque Italiae Regiones; Eæ sunt, Latij pars; Campania felix; Lucani; Calabria; Magna Græcia; Salentini; Apuli Peucetij; Apuli Dauni; & Aprutium. Vrbs, quæ Regno dedit nomen, lautissima Ciuitas Neapolis, maris littori & amœnissimorum collium radicibus apposita est. Aërem habet placidissimum & mollem; agrum iucundissimum; eoque hac ætate Principes, Illustresque viri non minori frequentia quàm olim, Neapolim concurrunt: etenim vniuersi ferè Regni huius Reguli maiorem anni partem hac in Vrbe exigunt, ædesque splendidissimas ferè omnes habent: vnde Principum, Ducum, Marchionum, Comitum, Equitum, Doctorum, Baronum, ac Nobilium hominum, plena, confertaque adeò est, vt paucissimas Orbis terræ Ciuitates huic exæquari Incolarum nobilitate posse censeam. Vrbs spacium amplectitur magnum, inter mare, amœnissimosque colles ædificata magnificè, mœnibus firmissimis, præsertim haud pridem iussu Caroli .V. Imp. consepta, munitaque. Ædes cum Diuorum, tum hominum ornatissimas ac splendidissimas, Arcesque penè inuictas habet. Ædes præ ceteris amplissimæ sunt, Ducis Grauinensis; item Salernitani Principis. Viæ Ciuitatis perelegantes, directæque. Curiaë quaternæ, quas Sedes appellant, Capuana, Nidensis, Montana, Diuique Gregorij; quo Principes, Duces, Marchiones, omnesque ceteri Ordines ad consultandum de rebus publicis conueniunt. Arces fortiss. sunt hæ; Castellum nouum, hoc Alphonsus primus instaurauit, operibusque maximis sepfit, adeò, vt firmissimis Europæ totius propugnaculis adnumerari meritò queat. Castellum hinc Capuanum, quod nunc Conciliis habendis, & Imperij, Ciuitatisque negociis attributum est. Item Castellum Oui, modico extra Urbem spacio, in scopulo (Meagrum veteres appellabant) cinctum mari. Præter hæc, Castellum Santemerense est in rupe, mœnibus Urbis imminente, superioribus Annis à Carolo .V. mirificè communitum. Extra muros australi parte moles in mari, opus arte summa factum conspicitur, ad Portus commoditatem atque tutelam, nauibus ex omnibus ferè Orbis partibus perpetuò pleni. Gymnasium etiam omnium disciplinarum Neapolis habet; ad quod studiosorum ex toto Regno maximus fit concursus. Extra magnificentissimam hanc Ciuitatem, ager amœnis. atque iucundis. est, non solum rebus ad hominum, animaliumque necessitatem; sed etiam ad voluptates atque delicias opportunis vndique confertus. Imprimis omne genus frumentum, vini que nobiliss. summam abundantiam fundit, adeò, vt qui non viderit, tantum vnus iugeri cum frumenti, tum vini vbertatem esse posse, haud facillè credat. Colles item hoc in agro feraciss. pleni que nobiliss. fructuum, & aliqui Theatrorum instar areas planas cingentes, venationibus ferarum opportunas. Præterea circum Neapolim horti amœnis. cultissimique, medicis, ac eiusmodi generosis arboribus ornati, dulcissimo que riuulorum vndique discurrentium murmure resonantes sunt. Nec vsquam abest odorum suauitas, quos passim abundantia myrti, lauri, gelsamini, rosamarinii, rosæ, &c. aspirat. Breuiter, horum locorum amœnitas, elegantia, delectatio, vix intra modum humanum consistere mihi profectò videtur; vt mirari nemo debeat, cum olim, tum hac ætate, præcipuos homines vitam hic degere solitos. Hæc ex Leandro excerptimus; apud quem plura: qui hanc Urbem eiusque territorium atque Regnum tam absolutè describat, vt Lectorem ad alium Auctorem minimè relegare visum fuit. Antonius Galateus doctissimè suam Iapygiam Peninsulam (quam hodie Puliam vocant) descripsit.

Maris Hadriatici siue Superi pars, nunc Diomedes insule, nunc S. Maria de Tarenti.

Golfo di Vinetia



Inferi maris

REGNI NEAPOLITANI VERISSIMA
MA SECUNDUM ANTIQVORVM ET
RECENTIORVM TRADITIONEM DE
SCRIPTIO, PYRHO LIGORIO AVCT.



Cum privilegio

